

MTUC tidak patut piket – MEF

KUALA LUMPUR 28 Jun – Kongres Kesatuan Sekerja Malaysia (MTUC) tidak seharusnya mengadakan piket dan mogok kerana ini akan menjejaskan pelaburan dan imej negara.

Pengarah Eksekutif Persatuan Majikan-Majikan Malaysia (MEF), Shamsuddin Bardan berpendapat, MTUC sebaliknya harus memberikan cadangan untuk meningkatkan produktiviti majikan bukan mengadakan piket ataupun mogok.

Menurutnya, beliau tidak bersetuju cadangan MTUC supaya pemberian gaji dalam sektor awam dan swasta diseragamkan.

Menurutnya lagi, setiap tiga tahun gaji kakitangan swasta akan diselarasakan berbanding kakitangan awam yang terpaksa menunggu selama 15 tahun baru diselarasakan oleh kerajaan.

“Perkara ini pihak MTUC tidak seharusnya mempertikaikan kakitangan awam kerana setiap tiga tahun kakitangan swasta akan

diselarasakan gaji berbanding kakitangan awam yang terpaksa menunggu selama 15 tahun.

“Sepatutnya pihak MTUC berbincang dengan badan yang bertanggungjawab supaya ia dapat diselesaikan dengan baik.

“Ini adalah satu perkara yang tidak wajar dan mungkin tindakan boleh diambil kepada mereka yang mengadakan piket atau mogok,” katanya ketika dihubungi disini hari ini.

Jelasnya, jika pelabur asing datang ke Malaysia untuk melabur dan terlihat atau terbaca di akhbar tentang perkara ini, mungkin ia menjadi satu masalah untuk mereka melabur dan ia akan merugikan ekonomi negara.

Jelasnya lagi, MEF hanya boleh memberi nasihat dan ia bergantung kepada pihak majikan masing-masing.

“Jika bisnes mereka teruk, macam mana nak naikkan gaji kakitangan mereka dan ini

perlu dikaji sebelum membuat sesuatu tindakan,” ujarnya.

Baru-baru ini, pihak MTUC telah mengadakan piket secara aman di lebih 13 lokasi berlainan bagi menuntut kerajaan menimbangkan gaji minimum RM900 dan Elaun Sara Hidup (COLA) RM300 untuk pekerja sektor swasta.

Di ibu negara, lebih 2,000 ahli MTUC berpiket secara aman di hadapan Ibu Pejabat Kumpulan Wang Simpanan Pekerja (KWSP), Jalan Raja Laut di sini dari pukul 5 petang hingga 6.30 petang dan menyebabkan kesesakan lalu lintas.

Selain mengibarkan sepanduk, mereka turut melaungkan kata-kata mendesak kerajaan memenuhi tuntutan supaya pekerja swasta diberikan gaji minimum dan elaun COLA.

Tegas Presiden MTUC, Syed Shahir Syed Mohamud, jika kerajaan tidak melayan permintaan MTUC itu, mereka akan mengadakan mogok sehari di seluruh negara.